

**BOSNA I HERCEGOVINA  
FEDERACIJA BOSNE I HERCEGOVINE  
KANTONALNO TUŽILAŠTVO  
TUZLANSKOG KANTONA TUZLA  
Broj: T03 0 KTKV 0037915 23  
Tuzla, 22.03.2023. godine**

## **OPĆINSKI SUD U ŽIVINICAMA**

Na osnovu člana 45. stav 2. tačka h) i člana 241. stav 1. Zakona o krivičnom postupku Federacije Bosne i Hercegovine, podižem

### **O P T U Ź N I C U**

#### **PROTIV OSUMNJIČENIH:**

1. **Avdibašić Reuf**, sina Asima, rođen 05.03.1956 godine u mjestu Brateljevići Općina Kladanj,
2. **Avdibegović Halim**, sin Bege, rođen 14.11.1964.godine u Kladnju, gdje je i

**Zato što su:**

#### **AVDIBAŠIĆ REUF I AVDIBEGOVIĆ HALIM**

**1.1)** Tokom 2015. i 2016. godine u Kladnju i Banovićima, Avdibašić Reuf, kao službena osoba, u svojstvu direktora Šumskog gazdinstva Konjuh, Javnog preduzeća Šume TK (u daljnjem tekstu: ŠG Konjuh i JP Šume TK), ovlaštenog da organizuje i rukovodi procesom rada u šumskom gazdinstvu, kontroliše primjenu važećih normativa i odgovara za primjenu opštih akata preduzeća (strana 41. Pravilnika o unutrašnjoj organizaciji i sistematizaciji poslova JP Šume TK /u daljnjem tekstu Pravilnik), istovremeno, kao član Uprave društva, odgovoran za zakonitost poslovanja, prema članu 135 stav 2 tačka 3 Statuta JP Šume TK iz maja 2005. godine,

a Avdibegović Halim, kao službena osoba, u svojstvu Šefa tehničkih poslova i pripreme rada u ŠG Konjuh, JP Šume TK, ovlašten da organizuje tehničke poslove u šumskom gazdinstvu, prati njihovo izvršenje i priprema elemente za izradu godišnjeg plana proizvodnje i investicija (strana 37, alineja 2 i 3 Pravilnika), a istovremeno faktički direktor i osnivač privrednog društva Forst Mont d.o.o. Kladanj,

pa je Avdibegović Halim, zajedno sa svojim bratom Avdibegović Zlatanom, tokom 2015. i 2016. godine, u restoranu Brana na Mačkovcu, organizovao sastanke sa vlasnicima

privrednih društava koja se bave poslovima sječe, primicanja i izvoza drvnih sortimenata za račun JP Šume TK, na kojim sastancima je, korištenjem svog uticajnog položaja šefa tehničkih poslova, sa namjerom da kontroliše dodjelu ugovora za izvođenje radova za račun JP Šume TK od strane kooperanata, sve uz saglasnost svog pretpostavljenog, Avdibašić Reufa, kome je prema Pravilniku, odgovarao za svoj rad – određivao ko će se od zainteresovanih privrednika prijaviti na pojedine postupke javnih nabavki, o kojima je kao službena osoba imao saznanja prije javne objave nabavke na stranici preduzeća i upućivanja poziva za dostavljanje ponuda na tri adrese, pri čemu je njegovo privredno društvo Forst Mont dobijalo najkvalitetnije poslove, pa su tako:

**1.2)** U vremenskom periodu od početka 2015. pa do kraja 2016. godine u Kladnju, u prostorijama JP Šume TK, Avdibegović Halim, svjestan da posreduje, koristeći svoj naprijed opisani službeni i uticajni položaj, da službena osoba u javnom preduzeću ne izvrši službenu radnju koju je dužna izvršiti, što je i htio, u više navrata posredovao kod **Rustemović Mirze**, službene osobe u JP Šume TK, referenta za javne nabavke, prema Pravilniku (strana 15) zaduženog, između ostalog, za izradu i objavljivanje obavještenja o javnim nabavkama, tako što je kod istog posredovao u korist pojedinih privrednih društava, na način da je Rustemoviću nalagao kojim će društvima poslati obavijest o pokretanju postupka javne nabavke, kao što su njegovo društvo Forst Mont, društvo Ramić ili društvo Kavaz, vlasništvo Kavazović Senada, člana Nadzornog odbora Šuma, ili mu govorio da će doći predstavnik nekog privrednog društva radi preuzimanja tenderske dokumentacije, te da zbog toga ne dostavlja obavještenje o provođenju javnih nabavki na tri adrese, kako je to predviđeno odredbom člana 7 stav 3 Pravilnika o postupku dodjele ugovora o uslugama iz Aneksa II, dio B Zakona o javnim nabavkama (Službeni glasnik BiH 39/14),

pa je tako u vremenu od 02.11.2016. godine do 07.11.2016. godine, nakon što je obećao Ahmetović Murizu, osnivaču i direktoru društva **Halsan d.o.o. Kladanj** da će dobiti ugovor za odjel 94 Šumarija Gornja Drinjača, sugerisao Rustemoviću da obavještenje za taj odjel pošalje samo privrednom društvu Halsan d.o.o. Kladanj i SP Ramić, vlasništvo Ramić Edisa, što je ovaj i učinio, iako je znao da se obavještenje moralo uputiti na najmanje tri adrese.

Dakle, Avdibegović Halim, koristeći svoj službeni i uticajni položaj, posredovao kod službene osobe u Federaciji da ne izvrši službenu radnju.

**1.3)** Dana 27.12.2016. godine, u Kladnju, Avdibegović Halim, svjestan da posreduje, koristeći svoj službeni i uticajni položaj, što je i htio, da službena osoba u javnom preduzeću ne izvrši službenu radnju koju je dužna izvršiti, uticao na **Huskić Almira**, člana komisije za Provođenje postupka javne nabavke po rješenju JP Šume TK broj 11616/16, i službenu osobu u JP Šume TK u svojstvu upravnika šumarije Gostelja, ovlaštenog da organizuje i rukovodi procesom proizvodnje u šumariji (str. 48 Pravilnika) tako što je od Huskića zatražio da povodom pokrenutog postupka javne nabavke za sječu i izvoz drvnih sortimenata u Odjelu 94, šumarija Gostelja, ŠG Konjuh, u vrijednost od 57,702,00 KM, eliminiše jedinog ponuđača za taj posao, **SP Šarić**, vlasništvo Šarić Nežada tako što će mu naći „bilo kakav razlog da ga odbije“,

pa je Huskić Almir, nakon takvog traženja od strane Avdibegovića, kao svog neposredno pretpostavljenog, pozvao telefonom Avdibašić Reufa, direktora ŠG Konjuh JP Šume TK, službenu osobu nadređenu Avdibegoviću, ovlaštenog da organizuje i rukovodi procesom rada u šumskom gazdinstvu, kontroliše primjenu važećih normativa i odgovara za primjenu opštih akata

preduzeća (strana 41 Pravilnika), istovremeno člana Uprave društva, odgovornog za zakonitost poslovanja, prema članu 135 stav 2 tačka 3 Statuta JP Šume TK iz maja 2005. godine – sa upitom da li je Avdibašić, kao direktor, saglasan sa naprijed navedenim zahtjevom Avdibegović Halima, nakon čega se Avdibašić Reuf saglasio sa protuzakonitim posredovanjem Avdibegović Halima, svjestan da ne obavlja svoju dužnost kontrole zakonitosti poslovanja, odnosno obavezu da obustavi od izvršenja svaki nalog koji nije u saglasnosti sa zakonom i opštim aktima, i da time ponuđaču Šarić Nedžad u nanosi štetu u vidu nedobijanja posla, što je i htio.

Dakle, Avdibegović Halim, koristeći svoj službeni i uticajni položaj posredovao kod službene osobe u instituciji u Federaciji da ne izvrši službenu radnju, a Avdibašić Reuf, kao službena osoba u Federaciji, propustio obaviti svoje dužnosti, čime je drugome nanio kakvu štetu.

**2.1)** U vremenskom periodu od najmanje godinu dana, od početka 2016. godine, pa do marta 2017. godine, u Kladnju, Ljubljani i Trzinu,

**Reuf Avdibašić**, kao službena osoba, u svojstvu izvršnog direktora ŠG Konjuh JP Šume TK, ovlašten da organizuje i rukovodi procesom rada u šumskom gazdinstvu i odgovara za primjenu opštih akata preduzeća (strana 41 Pravilnika), istovremeno u smislu odredbe člana 135 stav 2 tačka 3 Statuta JP Šume TK iz maja 2005. godine, kao član Uprave društva odgovoran za zakonitost poslovanja,

svjesno i voljno udružio više osoba u smislu člana 2 tačka 19 KZ F BiH tako što je pozvao **Avdibegović Halima** i druge uposlenike u JP Šume TK da postanu članovi grupe ljudi radi činjenja krivičnog djela – Zloupotreba položaja ili ovlaštenja – iz člana 383 stav 1 KZ F BiH i krivičnog djela – Pranje novca – iz člana 272 stav 2 u vezi sa stavom 1 KZ F BiH, tako što će ilegalnom prodajom drvnih sortimenata kojima gazduje JP Šume TK pribaviti novac za isplatu naknade radi pribavljanja upravljačkih prava od strane vlasnika dionica, a u svrhu ostvarivanja uticaja u organima upravljanja JP Šume KT,

pa su, sa sviješću i voljom da postaju članovi takvog udruženja, radi činjenja krivičnog djela – Zloupotreba položaja ili ovlaštenja – iz člana 383 stav 1 KZ F BiH i krivičnog djela – Pranje novca – iz člana 272 stav 2 u vezi sa stavom 1 KZ F BiH, istom pristupili: **a)** Avdibegović Halim, službena osoba u svojstvu Šefa tehničkih poslova i pripreme rada u ŠG Konjuh JP Šume TK, ovlašten da u gazdinstvu organizuje tehničke poslove i prati njihovo izvršenje (strana 37, alineja 2 i 3 Pravilnika), i **b)** službena osoba poznata Avdibašiću i Avdibegoviću, poslovode za iskorištavanje u Š.G. Konjuh, RJ Srednja Drinjača (u dajnjem tekstu **Poslovođa**), ovlašten da organizuje otpremu robe kupcima po datim dispozicijama (strana 65 Pravilnika) i **c)** druge njima poznate službene osobe iz JP Šume TK, pa je Avdibašić u vremenu od početka 2016. godine, pa do marta 2017 godine, kada mu je određen pritvor, vršio raspodjelu kriminalnih uloga stavivši Poslovođu u zadatak da putem ilegalne prodaje drvnih sortimenata i drugim vidovima zloupotrebe službenog položaja u JP Šume TK, kontinuirano pribavlja novac koji će predavati Avdibegoviću, nakon čega će Avdibegović i Poslovođa tim novcem plaćati naknadu Petan Zvonku, dioničaru sa 10 posto udjela u JP Šume TK, da bi ovaj zauzvrat opunomoćio Poslovođu da raspolaže Petanovim glasačkim pravima na Skupštini JP Šume TK, čime je grupa ostvarivala uticaj na donošenje odluka u javnom preduzeću.

Dakle, Avdibašić Reuf udružio više osoba u cilju činjenja krivičnih djela propisanih zakonom u Federaciji, a Avdibegović Halim postao članom udruženja u cilju činjenja krivičnih djela propisanih zakonom u Federaciji, a za takvo udruživanje radi činjenja pojedinih krivičnih djela nije propisana posebna kazna.

**2. 2)** U vremenskom periodu od najmanje godinu dana, od početka 2016. godine, pa do marta 2017. godine, u Kladnju, Ljubljani i Trzinu,

**Avdibašić Reuf** početkom 2016. godine, kao organizator grupe, u svrhu realizacije prethodno opisanog kriminalnog plana, kao direktor ŠG Konjuh ovlašten da organizuje i rukovodi procesom rada u šumskom gazdinstvu i odgovara za primjenu opštih akata preduzeća (strana 41 Pravilnika), i kao član Uprave društva odgovoran za zakonitost poslovanja (član 135 stav 2 tačka 3 Statuta JP Šume TK iz 2005. g.),

podstrekao drugog na učinjenje krivičnog djela – Zloupotreba položaja ili ovlaštenja – iz člana 383 stav 1 KZ F BiH, krivičnog djela – Pranje novca – iz člana 272 stav 2 u vezi sa stavom 1 KZ F BiH, na način da je zloupotrebom odnosa podređenosti naložio njemu poznatoj službenoj osobi, **Poslovođi** ovlaštenom da u toj radnoj jedinici kontroliše proces rada, organizuje obezbjeđenje i čuvanja imovine (strana 65 Pravilnika), da u prvih šest mjeseci 2016. godine, zloupotrebom službenih ovlaštenja, pribavi iznos 1.800 KM za kupovinu punomoći od Zvonka Petana, na način da se „snađe, al' da se ne primjeti“, koji novac, dobijen krivičnim djelom, će se utrošiti za plaćanje punomoći Zvonku Petanu

nakon čega je Poslovođa u prvoj polovini 2016. godine dva puta organizovao ilegalnu prodaju po 10 prostornih metara ogrijevnog drveta, na način da je Panić Zlatanu, otpremaču u RJ Srednja Drinjača, nalagao da omogući prevozniku da sa stovarišta na radilištima u RJ Srednja Drinjača utovari dva puta po 10 prostornih metara ogrijevnog drveta bez otpremnog iskaza, dok je prevozniku Ahmećanović Vahudinu naložio da ogrijev proda po cijeni od 64, 35 KM po prostornom metru, što je ovaj i učinio i Poslovođi donio iznos od 1280 KM,

a potom, u drugoj polovini 2016. godine, postupajući po prethodnom dogovoru i nalogu Avdibašić Reufa, radi pribavljanja preostalih 600 KM, u više navrata od Hanife Džananović primio dar da bi u okviru svoje funkcije učinio nešto što bi morao učiniti, tako što je za njeno privredno društvo Obrt Komerc vršio isporuku drvnih sortimenata u prethodno dogovorenim dužinama i predviđenim rokovima, pa je zbog toga dva puta primio dar, u iznosima od 300 i od 400 KM,

da bi **Avdibegović Halim**, po naprijed opisanom dogovoru u okviru grupe, od Poslovođe primio prvo 1.200 KM u julu mjesecu 2016. godine, a potom i 600 KM u decembru mjesecu iste godine, svjestan da je novac pribavljen učinjenjem krivičnog djela, što je i htio, takođe svjestan da umišljajem pomaže učiniocu krivičnog djela – Zloupotreba položaja ili ovlaštenja – iz člana 383 stav 1. KZ FBIH davanjem psihičke podrške i unaprijed obećanim prikriivanjem predmeta dobijenih krivičnom djelom,

pa je Avdibegović, nakon što je primio novac, zajedno sa Poslovođom, svojim putničkim vozilom četiri puta putovao u Republiku Sloveniju, gdje je Petan Zvonku, dioničaru u JP Šume TK sa približno 10 % dioničkog kapitala, dva puta, u julu i decembru 2016. godine, isplatio naknadu od po 900 Eura, znajući da je novac koji je dobio od Poslovođe pribavljen učinjenjem

krivičnog djela, što je i htio, a Petan je oba puta svojim potpisom ovlastio Poslovođu da disponira njegovim glasom

Dakle, Avdibašić Reuf, s umišljajem podstrekao drugog da učini krivično djelo – Zloupotreba položaja ili ovlaštenja – iz člana 383 stav 1 KZ F BiH, i krivično djelo – Pranje novca – iz člana 272 stav 2 u vezi sa stavom 1 KZ F BiH, a Avdibegović Halim sa umišljajem pomogao drugom u učinjenju krivičnog djela - Zloupotreba položaja ili ovlaštenja – iz člana 383 stav 1 KZ F BiH, i potom primio i raspolagao novcem za kojeg je znao da potiče iz učinjenja krivičnog djela u kojem je bio saučesnik

### **AVDIBAŠIĆ REUF**

3) Dana 19.10.2016. godine, u području Posebnog lovišta Konjuh, čiji je korisnik JP Šume TK, temeljem ugovora između Federalnog ministarstva poljoprivrede, lovoprivrede i šumarstva i JP Šume TK od 15.04.2013. godine – kao direktor ŠG Konjuh i član Uprave JP Šume TK, prema odredbi člana 135 stav 2 tačka 3 Statuta JP Šume TK iz maja 2005. godine, odgovoran za zakonitost poslovanja javnog preduzeća koje se prema članu 7 stav 3 bavi lovom i brigom o divljači; istovremeno obavezan, prema Pravilniku o unutrašnjoj organizaciji i sistematizaciji poslova JP Šume TK (strana 41 alineja 7 i alineja 14), da kontroliše primjenu važećih normativa i odgovara za primjenu opštih akata Preduzeća, također ovlašten prema odredbi člana 6 stav 1 Pravilnika o lovu i korištenju ulovljene divljači u posebnom lovištu Konjuh od 08.01.2002. godine, davati saglasnost na odobrenje koje direktor JP Šume TK izdaje radi izvršenja i organizacije lova, a prema odredbi člana 135 stav 2 tačka 3 Statuta JP Šume TK iz maja 2005. godine, kao član Uprave društva odgovoran za zakonitost poslovanja javnog preduzeća koje se prema članu 7 stav 3 bavi lovom i brigom o divljači,

pa je u vremenu od 2010. godine, pa do kraja 2016. godine, omogućio ilegalan lov Hasibović Huseinu, Sirovina Bahrudinu i Fikretu Prevljaku, tako što je Hasibović Husein bez odobrenja odstrijelio najmanje dva vepra, a potom svojim nečinjenjem i aktivnim radnjama stvorio uslove za odstrel vuka – pri tome svjestan i htijući da ne obavlja svoje službene dužnosti kontrole u primjeni važećih propisa sadržanih u odredbi člana 56 stav 1 i 3 Zakona o lovstvu, prema kojem se lov krupne divljači vrši na temelju dozvole za lov koju izdaje korisnik lovišta, a on kao direktor šumskog gazdinstva u kojem se lovište nalazi, daje saglasnost na dozvolu, te da je, iako je odgovoran za primjenu opštih akata, propustio da zabrani lov koji se odvijao suprotno Pravilniku o lovu od 08.01.2002. godine kojim je predviđeno u članu 6 i 7 Pravilnika o lovu da je za organizaciju lova potrebno odobrenje korisnika lovišta, sa prethodnom uplatom takse za pratnju, te u smislu člana 8 uplate posebne naknade za trofej i meso, a prema članu 9 Cjenovnika za lovstvo od 21.03.2014. godine uplata dnevne takse od 100,00 KM i naknade za odstrel u iznosu od najmanje 600,00 KM, a što je i htio,

pa je prvo svojim propuštanjem, a potom poduzimanjem aktivnih radnji, odnosno svjesnim i voljnim iskorištavanjem svojih službenih ovlaštenja u svrhu omogućavanja lova suprotno propisima, dana 19.10.2016. godine ne izvršivši svoje dužnosti kontrole primjene zakonskih

propisa i propisa JP Šume TK, dozvolio Hasibović Huseinu i Sirovina Bahrudinu lov bez odobrenja, u kome je i sam učestvovao, kojom prilikom je Hasibović Husein odstrijelio vuka dužine 1,77 metara i težine 40 kilograma, kojeg je Hasibović potom iznio iz lovišta bez uplate posebne naknade za trofej i meso, za čiji odstrel i iznošenje iz lovišta je trebalo uplatiti najmanje 600 KM, kao i iznos od 100 KM organizacione takse, te 100 KM nagrade za odstrel vuka lovočuvaru i pratiocu, da bi i u narednom periodu nastavio da organizuje lov za naprijed navedene osobe, čime je JP Šume TK pričinjena šteta od najmanje 800,00 KM, te je u istom iznosu i pribavio korist Hasibović Huseinu.

Dakle, kao službena osoba u Federaciji BiH ne obavivši svoje službene dužnosti pribavio drugom kakvu korist.

4) U vremenu od druge polovine 2011. godine, pa do 25.11.2016. godine, u Kladnju i u Sarajevu, kao službena osoba, u svojstvu direktora ŠG Kladanj, ovlašten da rukovodi procesom rada u šumskom gazdinstvu, svjestan da iskorištavanjem službenih ovlaštenja, postupa suprotno interesima službe da bi drugome pribavio korist na štetu JP Šume TK, što je i htio, u periodu od najmanje pet godina, od 2011. do 2016. godine, jednom godišnje, s jeseni, pet puta nalagao vozačima JP Šume TK da sa stovarišta u ŠG Konjuh, bez otpremnice i uplate u korist JP Šume TK, natovare na službeno teretno vozilo i prevezu do Sarajeva po 4 prostorna metra ogrijevnog drveta, po cijeni od 44,50 KM po jednom prostornom metru, i isporuče ih bez plaćanja **Eškerica Lidiji i Eškerica Vladi**, čime je drugom pribavio korist u iznosu od najmanje 890,00 KM, te u istom iznosu nanio štetu ŠG Kladanj.

Dakle, kao odgovorna osoba u Federaciji BiH iskorištavanjem svog službenog položaja pribavio drugome kakvu korist

5) Dana 27.01.2017. godine, u Kladnju, u svojstvu službene osobe, direktora ŠG Konjuh, ovlašten da organizuje i rukovodi procesom rada u šumskom gazdinstvu i odgovara za primjenu opštih akata preduzeća (strana 41 Pravilnika), i kao član Uprave društva odgovoran za zakonitost poslovanja (član 135 stav 2 tačka 3 Statuta JP Šume TK iz 2005. g.), svjestan da korištenjem svog službenog i uticajnog položaja, koji proističe iz njihovih naprijed navedenih direktorskih i šefovskih ovlaštenja, što je i htio, posredovao kod njemu podređenih uposlenika JP Šume TK, i to **Begić Enesa**, upravnika šumarije Srednja Drinjača, i **Huskić Almira**, upravnika šumarije Gostelja, obojica ovlašteni da, između ostalog, organizuju i usklađuju izvršenje proizvodnje po fazama rada (sječa, izvoz, otprema - strana 48 Pravilnika) – zatraživši od njih da učine nešto što ne bi smjeli učiniti, tako što će zaustaviti isporuke ugovorenih drvnih sortimenata privrednom društvu „**Tabo Nis**“ d.o.o. **Kladanj, vlasništvo Tabić Senada**, iako je znao da navedeno privredno društvo raspolaže dispozicijama JP Šume TK za preuzimanje drvnih sortimenata u okviru internih procedura javnog preduzeća i potpisanog ugovora, i uplaćenog avansa za isporuku drvnih sortimenata, na koji način je posredovao da službena osoba ne izvrši službenu radnju koju bi morala izvršiti, čime je privrednom društvu „**Tabo Nis**“ usljed manjka repromaterijala pričinjena šteta.

Dakle, korištenjem svog službenog položaja posredovao da službena osoba u instituciji u Federaciji ne izvrši službenu radnju

## AVDIBEGOVIĆ HALIM

6) U vremenskom periodu od polovine 2016. godine pa do septembra 2016. godine, u prostorijama i privrednim objektima JP Šume TK, ŠG Konjuh, a nakon što su, dana 01.02.2016. godine JP Šume za tu godinu zaključile ugovore o kupovini i isporuci drvnih sortimenata, i to: a) 2000 m<sup>3</sup> ogrijevnog drveta sa privrednim društvom Promet Tabić d.o.o. Kladanj, zastupano po direktoru i osnivaču Tabić Mirsadi, b) 2000 m<sup>3</sup> trupaca bukve, sa privrednim društvom TMIM komerc d.o.o. Kladanj zastupano po direktoru i osnivaču Tabić Mirsadu, mužu Tabić Mirsade, i nakon što se isporuka za ova društva do juna mjeseca odvijala po dinamici sukladno ugovorima – u potpunosti je zaustavljena u julu mjesecu iste godine, uslijed čega su navedena privredna društva ostala bez repromaterijala,

a nakon što su Tabić Mirsada i Tabić Mirsad zbog toga usmeno i pismeno prigovarali odgovornim osobama u JP Šume TK, a isporuke ni tada nisu nastavljene, Tabić Mirsad je, kada je obavješten da isporuke koči Avdibegović Halim, došao u avgustu mjesecu 2016. godine kod Avdibegović Halima, službene osobe i Šefa tehničkih poslova i pripreme rada u ŠG Konjuh JP Šume TK, ovlašten da u gazdinstvu organizuje tehničke poslove i prati njihovo izvršenje (strana 37, alineja 2 i 3 Pravilnika), i u njegovoj kancelariji mu predao kovertu u kojoj se nalazilo 10.000 KM u novčanicama od po 100 KM, da bi se privrednim društvima “TMIM Comerc” i “Promet Tabić”, a u skladu sa preuzetim ugovornim obavezama, nastavile redovne isporuke drvnih sortimenata, a Avdibegović je uzeo taj novac, svjestan da je primo dar da bi u okviru svoje funkcije učinio što mora učiniti, što je i htio, čime je za sebe pribavio korist u iznosu od 10.000 KM,

Dakle, kao službena osoba u Federaciji primio dar za sebe da u okviru svoje funkcije učini što bi morao učiniti

Čime su počinili:

**Avdibašić Reuf** – produženo krivično djelo – Zloupotreba položaja ili ovlaštenja – iz člana 383 stav 1 u vezi sa članom 32 i članom 54 KZ F BIH opisano pod tačkama 1.3), 2.2), 3) i 4) optužnice;

krivično djelo – Udruživanje radi činjenja krivičnih djela – iz člana 340 stav 1 KZ F BIH opisano pod tačkom 2.1) optužnice;

krivično djelo –Pranje novca– iz člana 272 stav 2 u vezi sa stavom 1 KZ F BIH opisano pod tačkom 2.2) optužnice;

krivično djelo –Primanje nagrade ili drugog oblika koristi za trgovinu uticajem– iz člana 382 stav 2 KZ F BIH opisano pod tačkom 5) optužnice;

**Avdibegović Halim** – produženo krivično djelo – Primanje nagrade ili drugih oblika koristi za trgovinu uticajem – iz člana 382 stav 2 u vezi sa članom 54 KZ F BIH opisano pod tačkom 1) optužnice;

krivično djelo – Udruživanje radi činjenja krivičnih djela – iz člana 340 stav 2 u vezi sa stavom 1 KZ F BIH opisano pod tačkom 2.1) optužnice;

krivično djelo – Zloupotreba položaja ili ovlaštenja – iz člana 383 stav 1 u vezi sa članom 33 KZ F BIH i krivično djelo – Pranje novca – iz člana 272 stav 2 u vezi sa stavom 1 KZ F BIH opisano pod tačkom 2.2) optužnice;

krivično djelo – Primanje dara i drugih oblika koristi – iz člana 380 stav 2 KZ F BIH opisano pod tačkom 6) optužnice.